

# **Cari jalan keluar - bukan sekadar pelega - bagi masalah kemiskinan**

*oleh*

Azhar Ibrahim Alwee

**R**AMADAN yang baru saja berlalu menampilkan kesungguhan masyarakat kita menderma dan membantu golongan susah.

Amalan tadi terangkum dalam erti keadilan sosial. Ia antara tuntutan setiap agama universal dan falsafah etika kemanusiaan.

Dalam Islam, bukan keadilan saja bahkan ihsan amat diutamakan.

Malah antara dakwah terawal yang diterokai Rasulullah *saw* adalah menegakkan keadilan sosial dengan melawan segala bentuk penganiayaan terhadap golongan lemah.

Keadilan adalah nilai yang sering diulang dan ditekankan dalam Al-Quran. Begitu juga, banyak hadis menyeru kepadanya.

Dalam tradisi Islam, persoalan keadilan sosial telah banyak dikupas dan dianjurkan.

Institusi baitulmal dan wakaf serta pembahagian zakat harta dan pengagihan zakat fitrah adalah instrumen sosial yang diwajibkan demi menjamin kesejahteraan masyarakat, khususnya kepada golongan miskin dan daif.

Zaman Islam klasik telah memberi perhatian pada perkara tersebut. Zaman moden pula harus terus memikirkan jalan terbaik menangani masalahnya yang lebih mencabar.

Namun matlamatnya tetap satu - menegakkan keadilan sosial.

Keadilan sosial yang kita dengar hari ini dikaitkan, antaranya dengan seruan mengeluarkan zakat, sehinggakan iklan Majlis Ugama Islam Singapura (Muis) berbunyi 'Zakat: Lambang Keadilan Sosial Islam'.

Tentulah ini harus disambut baik kerana falsafah zakat dapat dilihat dalam konteks yang lebih besar.

Tentu sekali ia menjemput penjelasan akan pengertiannya yang lebih meluas dengan harapan lebih ramai mendukung dan melaksanakan harapan keadilan sosial.

Pertama, keadilan adalah tuntutan Tuhan ke atas hamba-Nya.

Dalam doktrin tauhid, sifat Adil yang ada pada Tuhan sekali gus suatu sifat yang manusia harus akur dan teladaninya.

Keadilan bukan sesuatu idealisme abstrak, melainkan ia harus diterjemah menjadi sesuatu yang konkrit.

Keadilan sosial harus wujud dan dipertahan dalam sfera kehidupan sosial kita memandangkan ada tersempit dan terpinggir dalam struktur ekonomi akibat tiada sumber dan peluang.

Malah kepedulian terhadap mereka adalah tanggungjawab kita ke atas mereka.

Bantuan yang harus kita hulurkan itu bukanlah sesuatu 'habuan', 'ihsan' atau 'anugerah' kepada golongan tersebut, sebaliknya ia adalah hak mereka yang harus kita tunaikan kepada mereka.

Dalam ajaran Islam, harta dan kekayaan yang diberi kepada seseorang itu adalah amanah daripada Tuhan sehingga tertanggung di atasnya amanah untuk mengagihkannya kepada mereka yang memerlukan.

Mekanisme zakat yang diinstitusikan dalam Islam menjurus ke arah menyempurnakan suruhan Tuhan ini.

Kedua, keadilan sosial usah pula disertakan dengan bantuan semusim yang lebih ghairah dan pantas diberi sebagai habuan kepada yang memerlukan. Walaupun amalan ini terpuji sayangnya, nilai ihsan dan tanggungjawab itu masih bersifat sementara (ad hoc).

Sebaliknya keadilan sosial menuntut kita memikirkan kesempitan yang mereka lalui, mengupas mengapakah kesusahan dan kemelaratan itu berlaku dan mencari sebab musabab secara rasional dan berhemah sehingga dapat dianjurkan beberapa jalan keluar.

Oleh itu, kita perlu merubah ikhtiar jangka pendek yang lebih bersifat 'pelega' (relief) kepada yang kekal. Malah dalam proses membantu mereka, kita juga harus pastikan suara mereka mendapat perhatian dan penghormatan, bukan kita memaksakan bahawa kitalah yang tahu apa yang baik untuk mereka.

Oleh itu, merayakan keadilan sosial bukan sekadar dengan ghairah menghulur bantuan segera dengan kutipan kilat yang dibuat secara kolektif.

Bagi mereka yang mampu untuk menganalisis mengapa kemelaratan berlaku dalam keluarga-keluarga miskin tentunya terpikul di benak mereka untuk mengupas permasalahan ini sehingga dibicarakan dalam lingkungan awam dan mendapat perhatian di pihak penggubal dasar.

Sesungguhnya komitmen moral harus memacu semangat untuk menegakkan keadilan sosial, dan bukan pula ia bermotifkan perlumbaan mencari pahala saja.

Jauh sekali bantuan yang dihulurkan itu dibuat hanya untuk memperkuat profil peribadi kita dalam menjalankan kewajipan sivik, malah bukan juga untuk rebat cukai mahupun tayangan yang digemburkan menerusi media massa.

Usahlah lapar dahaga Ramadan kita disambut dengan kemeriahan dan kemewahan dalam Syawal, sedang 'lapar dan dahaga' sebagai lambang kesempitan golongan miskin tetap berlanjutan selamanya.

*Nota: Penulis pensyarah di Institut Pendidikan Nasional.*

\*\*\*\*\*

[Artikel ini telah disiarkan di akhbar *Berita Harian*, 18 Oktober 2007.]